

junges theater basel, kurs di 18h.

EKTOVITAL

aufführungen:

premiere: fr 22. juni 2012; 2te: sa 23. juni 2012; derniere: so 24. juni 2012, je 20h. im jtb.

mit:

antonino russo, jennifer kohler, Larissa Rapold, milena bee, Philipp Freise, Salomé Jean-Richard, Talia Lavater, Valentin Heim, Xenia Hofmeier (3/6:9).

leitung:

christian mueller; technik: julian kestler

kurz:

die seelen der menschen werden im 'himmel' auf das leben auf der erde vorbereitet. am ende haben sie gar nicht mehr alle lust dazu.

bühnenbild:

uv-licht, discokugel, nebelmaschinen in kröpfe, 4 felder auf boden, weisse ballons auf kröpfe.

requisiten/ kostüme:

nachthemd (3xl weiss), 20 weisse ballons, roter stift, uv-farbe

.01: einlass

1/ 9.: Anfang: Hinunterschauen

die spielenden sind irgendwo im nirvana/paradies/walhalla/limbo bevor sie als charakter auf die erde geschickt werden. irgendein unfassbarer raum.

.02: uv-licht/ nebelmaschine/ licht nm

| musik: siriusmo: einmal in der woche schreien. (52s)

sie schauen von oben auf die erde. oder von der seite, je nach definition. ev auf kröpfe sitzend?

valentin lueg mol, wie si umme renne.

salomé so lustig.

jennifer als ob sie öppis wichtigs z tue hätte.

antonino als ob si wichtig wäre.

larissa ui, lueg jetz mol dä a!

alle schauen und lachen

philipp üh, lueg mol dört! was mache die?

talia was isch das dört?

xenia wo?

talia dört links näb em wasser.

xenia näb em grössere oder chlinere? ah jetz gsehni s glaub. meinsch das?

talia jo dört.

valentin wuau, lueg! jez goht d sunne langsam uf.

larissa so schön.

.03: heller

aufrücken.

talia so ufstoh! dir penntütene! s isch tag! ab an d säck! hüja!

philipp isch das ächt toll dört? ich ha scho vill ghört...

salomé schiins mues me bis zu 100 johr dört blibe. mängmol sogar no meh.

antonino und me mues sich entscheide, öb me frau oder ma isch.
 larissa me cha das sälber entscheide? i ha gmeint, es wird vom zuefall entscheide.
 milena was? nur 2 sache? nur ma und frau?
 jennifer nur ma ODER frau!
 larissa git scho no meh, aber das hän si nit so gärn. si hän sone büechli, das heisst 'pass'
 und was me dört ine cha scribe, das gits. und wenn me s nit ine scribe cha, giz
 es nit. wenn me dr falsch pass oder gar kein het, döf me niene ane und mit andere
 chasch dr alles erlaube.

salomé dasch aber nit grad schlau. oder fair.
 larissa si si no nie gsi.
 milena und zu dene mien mir go?
 xenia mir *göhn* nit zu dene. mir *wärde* zu ihne.
 talia aber ich weiss doch no gar nüt.
 milena ich ha angst. ich will nit go.
 jennifer kei angst, zerst mien mir no vill lerne, bevor s ärnst wird.
 philipp bö, lerne. ich weiss doch eh scho wie alles got.
 antonino aso was git 23 mal 45?
 philipp was heisst 'mal'?
 antonino gsehsch.
 philipp ich ha gseit: ich weiss, wie alles got, nit wie alles heisst. ich glaub ich bi eh taub
 gsi, s letscht mol.

antonino tüpflischisse chasch scho. tüpfli durchfall!
 larissa aso ich ha chli schiss. was mues me alles chönne?
 xenia weisch wie schnuufe got?
 larissa schnuufe? wie got das? (hyperventilieren)
 jennifer das muesch gar nit lerne! das chasch denn von elei. velicht bechunnsch am afang
 no ne fuditätsch, aber denn lauft s.

larissa ganz elei? und das isch scho alles? nur schnuufe?
 talia jo. und ässe!
 antonino und trinke!
 milena und laufe!
 xenia und schwätze!
 jennifer und singe!
 salomé und tanze!
 philipp und fürzle!
 larissa und fliege?
 valentin und renne!
 salom/ jenni und lache!
 philipp und... so.
 larissa so vill sache? das chani doch nie.
 valentin das isch no lang nit alles.

2.: Was man alles für s leben wissen und können soll.

larissa was? was? was? was mues me no alles chönne? ich bi so schlächt vorbereitet.
 hoffentlich giz keini note.

milena ich mach mer e spick! ah, nei. wie selli dä mitnäh. got jo gar nit.
 jennifer so schwer cha jo das nit si, wenn s scho so vill mache.
 salomé du, wenn s nit guet machsch, denn bisch jo schnäll widr do.
 philipp jo aber denn mues ich als nöchschts widr ganz vorne afo. will doch nit widr e baum
 si, oder e kolibri.

valentin ei mol bini als scheiss bakterie uf d ärde cho. man das isch lang gange. entstande bini im darm vomene scheiss vogel. dä schisst in scheiss schnee und denn: 100'000 scheiss johr lang oder so bini unter emene scheiss gletscher igflore gsi, bis dä scheiss ändlich abgschmolze isch. und denn, woni s erst mol das scheiss liecht gseh ha, bini an dr scheiss sunne grad verträchnet. scheisse.

jennifer jo, sälber tschuld. muesch halt e guets wäse si, denn chunnsch au witr.

salomé cha ig öpis drfür, wenn i grad in chrieg ine gebore worde bi? wie sellsch do wüsse, was guet isch und was nit? denn weisch nur, was schlächt isch. meh giz nüm.

talia das weiss me eifach. das gspürt me dank.

salomé bi halt nit so hypersensibel, wie du.

xenia du weisch jo nit mol, wie e mensch funktioniert. wie vill chnoche het dr mensch zum bispil?

valentin e mensch het chnoche?

talia was si chnoche? vo wo selli das alles wüsse?

xenia packt sich milena und illustriert die knochen (wie marionette).

xenia stell dr vor das isch e mensch. dr mensch het zirka 212 chnoche...

valentin weisch es nit mol genau?!

xenia doch. aber nit jede mensch het glich vill chnoche. mängmol het eini e rippli meh, oder in de füess hets meh chnoche als bi andere. anderi händ weniger. jedefalls ghört dr mensch zu de säugetier und die hän alli 7 halswirbel. egal ob jetz e spitzmuus oder e giraff.

talia ou giraff, das bini au mol gsi. huere heiss gsi in dr savanne. aber d gazälle sin ganz nätt gsi. au mit de loie hesch chönne schwätze, wenn si satt gsi sin. aber am geilste isch s nashorn gsi, kei ahnig was das immer gfrässe het...

läuft als beduseltes nashorn rum

xenia sehr interessant, aber mir wäre no bi de chnoche.

talia du hesch vo giraffe avo vrzelle.

xenia jedefalls, wenn du ein vo dene halswirbel brichsch, denn chasch zum bischbil nüm laufe. je witer obe s broche isch, um so weniger chasch di bewege, bis me sogar vrstickt, will do obe d närve zu dr lunge dure gön. ich bi mol dokter gsi.

larissa jo, tierarzt.

antonino chnoche sin doof.

xenia aber natürlich cha me sich no ganz anderi chnoche bräche. dr zeche. oder s handglänk. s becki isch ganz miesam. und weh machts au. oder d nase: das het mer mol e ross (talia wird weggeschoben und zum ross, andere auch) broche. oder s rippli agrisse, woni mit mim brueder ume schlofsack gstritte ha. oder eimol bini vomene typ gflüchtet, aso eigentlich isch er nätt gsi, aber ich bi trozdäm gflüchtet...

jennifer kei wunder kennsch du di mit chnoche us! hesch dr jo au scho mol alli chnoche broche, denn hesch jede einzelne gspürt.

xenia packt jennifer:

xenia findsch das öpe lustig, he? meinsch es isch lustig noime abe z gheie? he?

jennifer isi, chumm mol abe.

salomé und überhaupt. ich ha ghört es sig nit ganz unfreiwillig gsi...

xenia was willsch jetz mit däm sage? he? willsch drmit öppe sage, dass ich freiwillig abe gumpt bi? dass i s dört nüm ushalte ha und lieber als muggeschiss als als e mensch widr zrug cho wär? he? willsch das öpe sage?

salomé nei, ich ha nur gseit, 'ich ha ghört es sig nit ganz unfreiwillig gsi'. meh nit, du dreisch grad voll dure, nit ich.

larissa was? me cha sälber wähle wenn fertig isch? voll praktisch!

philipp meistens wälsch aber nit sälber, meistens willsch eigentlich no blibe und denn
hesch e unfall. oder wirsch chrank.

antonino vo däm willi gar no nüt wüsse, ich will lieber wüsse was me so macht.

philipp chasch jo zueluege.

alle schauen philipp an.

philipp nit mir. dene!

xenia was isch das dört?

14: rücklicht

jennifer das? i glaub däm säge si 'auti'. dört sitze si drin und fahre vo eim ort zum andere.
meistens gön si go schaffe.

philipp mues ich denn au schaffe?

salomé irgendwann scho. chunnt chli druf a, wo und wenn du gebore wirdsch. mängmol
muesch scho go schaffe, wenn du ganz chli bisch. und anderi mien nie schaffe.
die läbe vom schaffe vo andere.

antonino üh und was isch das? das isch jo riisig. (riecht) und es stinkt.

talia ah das hani glaub schomol gseh. das isch e... graus... riiserüsseldings.

milena nei, das heisst elefant.

talia jo uf di sprooch velicht. mir giraffe händ däm immer graus riiserüsseldings gseit.

philipp dört isch jo e huere mais!

salomé ah das. das isch krieg. dört bringe si sich gegesittig um.

philipp waaaaas? wieso mache si das?

salomé ihri scheffe hän gseit, si mien.

philipp und die mache das denn eifach?

valentin jo. oder süscht wirdsch grad umbrocht statt erst im kampf.

philipp und wieso kille si nit eifach d scheffe?

valentin wenn me das wüsst.

philipp und kämpfe si guet, die scheffe? was mache si, wenn die tot si. isch denn fertig?

larissa d scheffe kämpfe doch nit sälber. die lön lo stärke.

philipp voll fies. um was kämpfe si denn? was chame gwünne?

salomé am schluss hän beidi verlore.

philipp und wär isch das mit dr rot-wisse chappe?

valentin das isch walter.

alle je, ich ha walter gfunde!

jennifer was isch das? das fahrt jo nur im kreis. so chömme die nie zum schaffe. sin die
dört freiwillig druf?

larissa däm seit me glaub 8i-bahn. das bini aber nie gsi. nit as i wüsst jedefalls. me
vergisst jo au immer schnäll vill.

philipp weh. hö? wiso chunnt bi däm s ässe us em muul. i ha gmeint, das mues dört ine.
das chunnt doch denn noime ganz anders use. wiso macht dä das?

15: front/ spiellicht

antonino jo und wie isch das denn? machts peng und denn stoht me plötzlich uf dr wält?

jennifer nei, eh nit. z allererst bisch so inere dunkel höhli in. aber schön warm isch s. use
chasch nit, erstens weisch nit wo und zwoitens bisch an dim buch mit soneme seil
abunde. das macht mega weh, wenn d das eifach so use rissisch. hän si gseit!

xenia und denn, wens langsam äng wird, denn muesch dur sone ganz chlises loch use.
aber meistens zieht öper uf dr andere site wens chlemmt.

philipp ich ha ghört, die schnide di mit emene mässer use. isch das nit gfährlich? was isch wenn die mi in dr mitti dureschnide?

milena aso i ha voll kei luscht als zwoichöpfigs monster uf d wält cho.

salomé wär het das scho. (alle schauen zu philipp)

philipp he, ich ha nit chönne wähle. das isch mer zueglost worde. dr eint chopf isch gar kei richtige chopf gsi. dä isch nur gsi, für... egal. lustig isch s trozdäm gsi. und es isch e ufstig gsi!

salomé und wenn me dört dusse isch, isch me e mensch?

larissa jo, aber no ganz e chline. eigentlich chasch erst schnuufe, ässe und schisse. das si sozäge die menschliche grundfunktione. alles andere isch optional.

antonino und was macht me denn dr ganz tag?

jennifer ebbe. schnuufe, ässe und schisse. aber kei angst. normalerwiis hetz immer es paar älteri, wo uf ein luege. si gäbe z ässe, butze di. legge der chleider a. trage di umme. schwätze mit dir. bringe di ins bett... aso, bestefalls.

valentin mit dr zit wirtsch au immer unabhängiger und irgendwann gön dir d eltere so uf e sack, dass de dört wäg muesch und frei si willsch. denn bisch e richtige mensch. muesch aber au für alles sälber luege.

antonino das tönt aber nach vill arbeit. ich nimm denn e abchürzig.

larissa was abchürzig? nüt abchürzig! bschisse zellt nit!

talia was bschisse? isch das e spili?

3. das spiel beginnt:

philipp jo irgendwie scho. eigentlich isch s e riisigs spili. avo duesch uf fäld null. no bevor du uf d wält chunnsch, muesch di dure setze. als eis einzigs vo 300 millione spermie muesch di bis zur eizälle dureschloh. aber nur wenn du erste bisch, giz e mensch drus.

spermienrennen: zuerst in nebenhodenformation, ein paar mal pressen, durch den samenleiter richtung publikum springen, durch den raum die eizelle suchen, alle sterben, jemand gewinnt.

16: spot

valentin ja! erste! (findet eizelle im publikum)

alle anderen ou. (muff)

milena (kommt erst später) mi bringt eh dr storch. mini eltere glaube eh nit an d evolution! und an sex scho gar nit!

valentin und jez? was passiert jetz?

jennifer jez muesch warte. am beste 9 mönet oder so.

valentin 9 mönet? mit dere? voll langwilig. (geht von schoss).

17: spot weg

jennifer du muesch dänk jez wachse und dim mami e dicke buch mache.

valentin he! nit *ich* ha dä dick buuch gmacht!

jennifer egal. jez muesch eifach hoffe, dass dis mami halbwegs vernünftig isch und keini droge nimmt. das isch nämli gar nit guet für di. aso mami: kei heroin meh, kei alkohol, kei nikotin und vorallem keini medikamänt. (dazu ballons als bauch, die platzen)

talia und keini ifersüchtige manne...

antonino chömme mer jetz ändlich mol uf fäld eis? ich wott afo!

salomé jo. fäld eis. dr witz isch ebbe, dass gwüssi scho mit vorsprung ins renne gschickt wärde. nit ganz gerächt, isch aber so.

larissa jä was wiso? (zu den folgenden texten legt die sprechende person je ihren arm um die schulter, sie wird dabei fast erdrückt)

salomé lueg, mängmol wird me in e ganz e armi familie ine gebore. wo chum gnue ässe für sich het. denn muesch velicht scho as halb verhungerts chind in d fabrik go pajette uf chinderchleidli näie. pro tag schaffsch velicht ei chleidli, wo denn im tallyweilly für 5 franke verchauft wird. und du bechunnsch 20 rappe am tag, wen d glück hesch. dasch natürlich päch.

xenia mängmol, si aber dini eltere sau rich. und du wirtsch die ganz zit vo hinde und vorne bedient. du erbsch d firma vo dim papi und vererbsch se irgendwann an di sohn witer. schaffe hesch nie miesse und verantwortig hesch immer delegiert. aber au das heisst nit, dass du e glücklichs läbe hesch.

valentin dr witz isch ebbe: me cha nit vorusgseh, wie me use chunnt. mängmol wachse us de schlimmste umständ die beste mensche, und mängmol nütze eim au die beste umständ nüt und me blibt e arschloch.

larissa das seit me nit.

valentin was? mensche?

larissa nei das schimpfwort. das seit me nit.

valentin arschloch?

larissa jo, me isch dank aständig.

valentin weisch was? jede tag verrecke hunderttausigi vo mensche, nur dass ihri scheffe no richer wärde und ihres gäld uf de banke verstecke. *DAS* isch unanständig! und du regsch di drüber uf, dass ich arschloch gseit ha?

larissa du regsch di uf. nit i. aber wie isch jetz das gsi mit de mensche?

valentin stimmt. nit nur di charakter wird absolut willkürlich zämmegstellt. au di körper. wie immne mixer. do es bei, do chli huttfarb, do mol e chrummi nase, do es chlises schnäbi, do roti hoor und do giz no chli hoor am rugge.

salomé velicht bisch behinderet. aber wo und wie stark und was du drus machsch, wird sich zeige. oder ob du roti oder gagibruni schamhoor uf em chopf hesch, dick oder z gross wirsch. wie du usgsehsch, das blibt alles zuefällig. und d frog isch jedes mol: was machsch us däm, wo de hesch? was chasch überhaupt mache?

valentin sogar das isch noni alles: in weli zit, in weli gsellschaft und in weli umgäbig du inegebore wirsch, isch au völlig zuefällig. und no vill zufälliger isch, wär du trifftsch und vor allem: wär nit.

jennifer eigentlich sett s läbe vrbote wärde. isch e reins glücksspil. s läbe sett höchstens im gschütze rahme vomene kasino gläbt wärde.

18: casino licht

roulette spielen und auf sachen setzen:

philipp 100 uf mi usbildig zum pilot.

valentin ich setz alles uf die frau!

antonino rien ne va plus

1.1: drehlicht

1.2: casinolicht

antonino oh leider verlore, si isch abghaue mit em pilot.

larissa ich steck alles in mis super begabte wunderchind.

antonino rien ne va plus

1.3: drehlicht

1.4: casinolicht

antonino leider bim grille d händ verbrennt, cha nie meh gige spile. alles verlore.

milena ich setz mis auto! als taxifahrer isch s nit so wichtig.

antonino rien ne va plus

3.5: drehlicht

3.6: casinolicht

leider verlore. du bisch jetz arbeitslos und alkoholiker!

talia das isch aber nit fair, wenn gar nit alli die gliche startbedingige hän.

philipp und will s läbe ungerächt isch, dreie mir uns jetz ganz schnäll im kreis. so schnäll wie me cha. und nach 10 umdreiige üebe mer das emol!

4. ab in d schuel:

alle drehen sich ganz schnell. bis einem sturm im kopf ist. man sucht die startposition.

philipp los!

9: spiellicht mit rot

alle fallen zu boden. geburtsschrei. zuerst laufen rennen.

musik: fight club bossa nova

chaotisches rennen. irgendwann joggen alle in einer linie.

jennifer psst. du, was mien mer jetz mache?

antonino ähm, renne glaub.

jennifer aha. psst. wo ane?

antonino ähm, grad us!

valentin weiss öper, wo mer ane renne?

jennifer glaub ins muki-turne!

xenia nei, zur chinderärztin go impfe.

milena ich ha grad glernt uf s töpfli go!

philipp aso ich renn in chindergarte.

larissa ich cha jetz scho mit gable und mässer ässe!

valentin ich has! mir renne in d schuel!

geteilte meinungen zur schule (einige freuen sich, andere weniger).

alle sitzen im halbkreis in der schule. eine person rennt immer noch.

valentin wie lang hesch no?

talia jo ich ha chli länger. mues no e johr meh in chindergarte.

philipp so chumm, bi uns wärde behinderti chinder integriert. dä mit dr grösste lernschwächi stoht eh vorne.

ton: driiing (schulglocke).

aufstehen, ein schullied wird gesungen:

guten morgen guten morgen, good morning good morning, buenos dias buenos dias, buon giorno bon jour.

larissa so. als ersts lernt me d buechstabe. das isch e 'A'...

zeigt vor.

alphabeth lernen: eurythmie und eigene buchstabenbilder finden. sie verarschen sie hinter dem rücken.

milena und was heisst das?

antonino p-f-o-s-t-e! he! goz no?!

larissa aso, dir händ eifach e schrecklichi seelehaltig!

xenia und jetzt rächne! $1 + 1$ git... $2, 2 + 2$ git... $4, 4 + 4$ git $8, 8 + 8$ git $16, 16 + 16$ git 32 und 32 mal 32 git 1024 und die 32 . wurzle vo 1024 isch 1.24185781207348 . so fertig grächnet.

salomé was isch mit vektorgeometrie?

xenia vernochlässigbar.

valentin was mit algebra?

xenia dur e variabli ersetzt.

talia und jetzt weiss me scho alles wichtige? goz jetzt los?

philipp nei, jetzt wo du schribe lernst hesch, muesch ganz vil schribe.

jennifer und wil du rächne lernst hesch, muesch ganz vil rächne.

salomé und wil du läse lernst hesch, muesch au ganz vil läse.

valentin hätti doch nüt lernst.

philipp und denn giz e teschtli über das:

musik: wer wird millionär?

I0: quizlicht

talia was isch dr längsti fluss vo australie?

milena murray river 2'375 kilometr

jennifer weles isch die ältisti bewohnti stadt vo dr schwiiz?

salomé chur.

antonino wiso giz m&ms?

philipp das d soldate schoggi ässe chönne, ohni ihri waffe zverschmire.

larissa bis wenn isch no koks im cola gsi?

xenia 1902

jennifer wenn het dr albert hoffmann s LSD entdeckt?

antonino 19. april 1943

philipp wenn isch tschernobyl gsi?

xenia tschernobyl giz no!

philipp jo, wenn isch d reaktorkatastrophe in tschernobyl gsi?

larissa 26. april 1986

talia wenn isch dr fc basel gründet worde?

valentin am 15. novämber 1893 in dr schuemacher-zunft

larissa zu wievil prozänt bestöh zehn us wasser?

salomé zu 7,8%

talia wievill bluetplättli het e mensch?

xenia 5,2 millione. durchschnittlich

philipp a welem tag isch dr bob marley gestorbe?

salomé 11. mai 1981, e mentig.

philipp an was?

valentin an diverse tumor

jennifer und dr kurt cobain?

philipp zistig 5. april 1994

salomé sälbstmord. bleivergiftig.

jennifer was si die letschte wort vom goethe gsi?

alle mehr licht! (licht wird hell (spiellicht))

I1: spiellicht

usik: aus!

valentin fak schribt me mit 'u' und 'ck', will s änglisch isch!

philipp lernt me nur so sache uswändig in dr schuel? gitz nit wichtigiri sache, als läse, schribe und all die zahle und näme?

5. was man in der schule nicht lernt:

milena doch doch. spicke chasch no lerne!
valentin was de mit ere matur machsch
xenia jo das frogi mi au...
larissa sms schribe, ohni z luege!
xenia sich elei vor dr türe... beschäftige!
salomé du grusigi!
xenia was? nit eso!
valentin gege autorität si!
philipp mit m uhrglas anderi blände
antonino unbekifft usgseh!
larissa so vom thema ablänke, dass dr lehrer e stund lang über öpis anders schwätzt!
jennifer unterschrifte vo de eltere fälsche!
salomé schöni auge mache und lehrer erprässe
valent/phil meitli in brunne schmeisse
milena liebesbriefli schribe, heimlich verliebt si.
antonino jo. in lehrer.
alle du bisch verliiiiiieebt! du bisch verliiiiiieebt!
milena das stimmt gar nit. höret uf. ich bi nit verliebt in lehrer. ich bi doch lesbisch!
alle lachen und machen witze
milena mobbing lernsch au!
talía denn gang i aber lieber nit dört ane.
larissa das stimmt doch nit, me lernt sicher au normali sache.
salomé jo, wie me uf d schultere vom kolleg chlätteret, das hani mol chönne bruche!
xenia hesch gwüsst: würmer gumpe, wenn du essig drüber machsch.
larissa ich will nit in d schuel!
jennifer du muesch! alli mien in d schuel!
larissa jo aber, wie find ich zum bispil fründe? wie lernt me das?
salomé chame nit lerne. passiert eifach so. oder au nit.
xenia oder es git 5 standartpenis: die wo dünn und churz si, denn die, wo unde dick sin und gege ändi dünn, denn... die lange dünne und die normale!
larissa das si erst 4 gsi.
xenia jo was isch die 5t gsi? ich weiss es nüm.
milena die, wo nach ine gön.
antonino nei, die wo umme egge gön.
valentin irgend e königin het 3 brüst gha.
salomé kennsch dä mit de 2 höde? aso mit de 4 höde. höde? was isch d mehrzahl vo hode? ah: 2 hodesäck.
jennifer e kanguruh het 2 vaginas und 2 gebärmüettere und zur geburt bechunnt si sogar no e 3te usgang über. die chönne 2 chinder glichzittig i unterschiedliche stadié ustrage. und wenn s zweni ässe git, denn haltet sis eifach a. und drfür hän d männli au immer grad 2 vo bedem. wieso weiss i jez aber au nit.
larissa das interessiert doch niemer!
alle doch!
larissa aso mi nit.
salomé und dass me spinat nit döf ufwärme!
jennifer was? das stimmt doch gar nit! das isch doch e märli!

salomé doch das isch wäg de nitrat im spinat, wo sich in nitrit und denn in giftigi nitrosamine umwandlet! das isch bsunders für chinder gförlich!

xenia jo aber denn miesstisch dr spinat e ganzi wuche immer wider ufwärme, und unmänge drvo ässe, bis de blau wirdsch!

alle spinat isch doof!

alle sind muff!

philipp konflikt löse, das lernt me nit!

antonino oder wie me fraue richtig aspricht.

xenia wie me im wald überläbt.

valentin dr richtig umgang mit schwule, homos, usländer und däm pack!

jennifer auto fahre au nit!

salomé wie me d hoor färbt.

valentin mit me bär kämpfe.

philipp wie me sich rasiert.

milena mit gfühl umgo.

jennifer küsse lernsch nit.

alle schliessen augen und knutschen die luft. es darf auch lustig aussehen. es wird intensiver und lasziver. jemand (oder ein paar) geht voll ab.

antonino und vögle/ bümsle lernsch nit!

larissa was isch das?

antonino jo das isch, wenn sich d mensche... multipliziere.

larissa was?! die rächne mitenand?

antonino nei, die mache chinder. aber si si immer mega verchlemmt, wenn si drüber rede sette.

salomé und wenn teenager über sex rede, finde sis no schlimmer. die meine denn immer, me wird scho schwanger, wenn me drüber redet. oder si meine, me hett denn scho meh sex gha, als die alte in ihrem ganze läbe.

philipp velicht isch s au, will teenager scho geil usgseh chönne, aber eigentlich no chinder si. und will die erwachsene sich nit igestoh chönne, dass si uns zwar scho geil finde, aber nit geil finde döffe, giz so nes gschiss.

jennifer und wie got jez das 'sex' zügs?

valentin frog si, si weiss das scho. si cha s dir erkläre.

larissa frog si!

talia frog si!

alle schieben verantwortung weiter.

xenia woni s letscht mol dört gsi bi, hän mer 3 mol! 3 MOL!!! hei mer sexualkundeunterricht in dr schuel gha, aber sex hani nie gha. drbi hani doch alles scho genau gwusst. wie d folikel sich zu eizälle entwickle, gälbkörperphase und dr eisprung. wie sich d spermie in dr gebärmueter iniste und wie das baby denn am schluss widr dört use chunnt, wos ganz am afang ine isch.

valentin ich will aber sicher nit us em fudi use cho!

jennifer wehh. wie chunnsch jez uf das?

valentin glaub dr sido isch us em fudi use cho, dä het doch mol sones lied drüber gschribe. glaub. oder nit?

milena also ich ha gmeint, me mues zerst verliebt si, bevor s chinder git.

salomé mues me nit, aber es hilfft.

philipp hör mer uf mit verliebt si.

valentin was? was isch das? verliebt si?

philipp das isch huere miehsam!

larissa nei das isch mega schön: verliebt si isch, wenn me eifach alles toll an ere andere person findsch. egal wie doof si isch oder wie doof das isch, wo si seit.

jennifer me vermisst ihn oder si, au wenn me se chuun gseht oder oder chuun kennt. me findet ihn eifach besser als alli andere mensche und me macht sache, nur zum dere person gfalle. zum bispil pinki strumphose azieh, nur will me meint, es gfalli ihm.

salomé wenn me verliebt isch cha me nüm ischlofe, will me immer an die person danke mues. me het kei hunger me. me macht die gliche sache, nur zum zit mit dere person z verbringe. me wird veganer. me mischt sich ständig in d gspräch i. me duet se heimlich beobachte und findet jedes detail ge-ni-al.

mehrere geniaaaaal!

xenia am liebste würd me dere person grad ume hals gumpe. (sie machen das) se küsse, in de hoor chraule, zämme lache, händli haltent im park sitze. me risst sich zämme und isch mega nätt und nimmt keini droge meh.

antonino oder me nimmt erst rächt, will me au 'cool' will si. und me macht sich doch lächerlich.

jennifer me findet die person toll und blöd glichzittig. und das gfühl im buch... wie... jo halt wirklich wie schmetterling im buch.

milena aso das tönt rächt komisch für mi. eher, als ob me zum psycho wird. und schmetterling im buuch, wie sell das go?

valentin wär schmetterling im buch het, het sich doch raupe in arsch gschobe.

mehere weeeeh!

milena es isch denn au immer alles bald mega kompliziert. weisch, denn stohsch uf öper. aber die person nit uf di. und nach de summerferie: stoht si uf di, aber du nümm uf si. und denn het si e fründ und du stohsch widr uf si. denn mache si schluss und du gestohsch ihre di liebi, nur zum usefinde, dass si scho widr e noie het. und denn fällt mer erst uf, dass si mit allne flirtet.

talia wart mol, ich chum nüm drus. me stoht uf enand, wenn me verliebt isch?

schleicht sich zu einer person und tritt auf den fuss. (optional): die person schleicht sich an, schliesst die augen und versucht sie zu küssen.)

larissa au! gang vo mim fuess!

talia aber ich stoh uf di.

larissa au aber das macht weh!

salomé liebi macht mängmol weh!

talia hani öpis falsch gmacht?

larissa jez gang ändlich vo mim fue! du stohsch jez uf mir, nit uf mi! verstohsch? me mues dank nit uf öper richtig ufe stoh.

talia aber wiso heisst s denn so? i chumm nümm drus.

larissa kann sich endlich aus dem würgegriff talias lösen. wirft sie zu boden und steht mit einem fuss auf talia.

talia stohsch jez uf mi?

larissa nimmt fuss weg.

larissa nei mann!

talia i chum nit drus. wie mues me denn das mache mit dr liebi? he? wie got das? wie? wie? wie?! got?! das?! WIE?! GOT?! DAS?!?!?!?

niemand antwortet. talia steigert sich in heulschreikampf. philipp hilft talia auf.

talia was me mues mache zum glücklich si. das lernt me au nit. chame überhaupt elei glücklich si?

philipp wenn de willsch zu 100% sicher si, dass es dir guet goht, muesch erreiche, dass es allne guet goht. will du zu dene allne ghörsch, goht s denn au dir guet. so isch das. chani sogar bewise: 100% glücklichich mensche. du zu 100% au drbi. 99% glücklichich mensche. du zu 99% drbi. isch zwar e gueti quote, aber das einte % bisch denn velicht doch du. radikale, soziale egoismus, sozäge.

antonino velicht isch das einte % sogar sehr glücklich.
 salomé die kategorie git s nit.
 valentin was isch jetz mit dr schuel? ich glaub ich has langsam gseh.
 alle ich au.
 salomé aso was hän mer jez glernt?
 jennifer schuel isch wichtig, will me alles fürs läbe zwüsche de stunde lernt und alles, wo
 me nit bruucht, in de stunde dure nimmt. so dass me weiss, was me vergässe cha.
 während dem folgenden text: eindehnen

6. jetz foht s läbe a!

xenia ok, und jetz? stirbt me jetz? wär s das ändlich gsi? nei! jez foht s läbe erst a. me
 strittet ganz vil und fest mit de eltere. weisch, eigentlich hän ein d eltere ganz
 fescht gärn, so dass si eigentlich gar nie wän, dass d chinder usziehn. wäge däm
 mien d chinder immer strite, dass ein d eltere weniger gärn hän und d chinder
 ändlich uszieh chönne.
 alle achtung.
 alle in startposition für sprint.
 alle fertig.
 fudi ufe.
 alle los!
 in zeitlupe nach vorne rennen. erste immer wieder zurückziehen. alle gewinnen.
 alle freedom!
 in motivationskreis gehen.
 alle 1,2,3 frei! jeeehh!
 valentin/alle (**das fett gedruckte: alle!**) freiheit heisst: du hesch **keini** verpflichtige meh und
 niemer wo di kontrolliert: **keini** ämtli meh: **kei** kompostkübel leere, dass me s
 sackgäld bechunnt. **kei** um ässensgäld bättle. **keini** chleiderdiskussione. **kei** tisch
 decke, rase mähie, brueder hüete und **kei** gäld meh gege gueti note! ich riss mi
 los vo dere **kapitalistische leistung-prostitution!**
 talia und freiheit heisst: kei gäld! (niemand macht mit, sie ist enttäuscht)
 valentin abr es heisst, du chasch znacht hei cho, wenn du wettsch und niemer het im
 dunkle uf di gwartet.
 philipp und du chasch usschlofe so lang du wettsch. wenn de vorhär nit vrfrore bisch, will
 niemer holz für d holzheizig gholt het.
 jennifer und dr mitbewohner luegt widr alli star wars folge am stück. die ganz nacht. so
 luut.
 larissa und d chatz vo dr mitbewohnerin pisst widr mol uf mi vortrag.
 milena nei aso mis läbe wird vil besser:

I2: 4 felder statisch

ton: musik: zirkusmusik1 (laut!)

verschiedene leben in schnelldurchlauf. choreo-rundlauf: vorne rechts: geburt, schule, letzter
 schultag, arbeit, familie, tod: vorne links. der rundlauf läuft ein paar mal durch mit
 sprache/lauten. dann wird es ruhiger, wenn die einzelnen kleinen szenen sich kurz aufstauen
 um wieder in den kreislauf einzugehen.

I3: mitte vorne hell, lauflicht 4 eggli

usik leiser!

milena nach dr matur, gangi zerst mol uf südamerika go reise.
 antonino ich mach zerst d RS, dass das mol gmacht isch. denn an d eth go architektur
 studiere! oder wird hanfbuur!

valentin i bi untauglich!
philipp ich mach zivildienst!
salomé ich bi e frau!
restliche ich au! (die bleiben aber im kreislauf)
xenia ich weiss es noni!

13.1: 4 felder statisch

usik laut!

szene löst sich wieder auf > kreislauf. ca 20sek

13.2: mitte hell, lauflicht

usik leiser!

salomé ups ich bi scho schwanger! nit ufpasst!
larissa ich ha scho 2 mol abtribe.
talía und ich ha e fehlgeburt.
jennifer aso ich bi glücklich mit minere früehe schwangerschaft! und mi fründ stoht au zu uns!
freund geht (philipp).
jennifer wenigstens zahlt er!
freund zeigt finger.
jennifer denn zahlt halt dr staat!

13.3: 4 felder statisch

usik laut!

szene löst sich wieder auf > kreislauf. ca 20sek

13.4: mitte hell, lauflicht

usik leiser!

salomé ich hürot jetz schomol und wird huusfrau und mueter! dr ma zahlts!
xenia ich ha dr master in chemie! und gang jez mol in d novartis go schaffe! oh yes!
philipp ich ha dr master in soziologie und gang jez zerst mol uf afrika go de arme negerli hálfe! und denn schaffi bi pro natura, bi dr GGG und bi dr christoph merian stiftig.
xenia ich erfind e revolutionäri noii energiequelle!
salomé wo sich 10 jehr spöter als unkontrollierbars risiko usestellt.
xenia na und! ich ha vill gäld drmit vrdient. i cha mir e sichers huus wit wäg leiste.

13.5: rüch

usik aus!

larissa und denn: wirtschaftskrise. widr emol. e paar chömme drvo, e paar wärde no richer und e paar tätschts.

14: 1,2oder3

alle 1, 2 oder 3, 1, 2 oder 3 - letzte chance... vorbei! ob ihr wirklich richtig steht, seht ihr, wenn das licht angeht.

15: mittellicht

wer am falschen ort steht, stirbt (alle ausser philipp).
philipp so, und noch dr krise si sich alli einig: me mues öpis mache, dass so öpis nie meh passiert. aber die wo öpis chönnte mache, mache denn doch nüt.

musik an: zirkus2!

16: 4 felder statisch

alle wieder in kreislauf. ca 20sek

usik leiser!

16.1: lauflicht

xenia ich wird politiker. und bi gege alles! gege schininvalidi, gege schinasyllante, gege usländer, gege moslems, gege mensche, gege jedi vernunft!
milena aso ich bi immer für das, was si seit.
alle ich au!

valentin und ich bi prinzipiell drgege, was si seit.
alle ich au.
talia i chauf mer e zitig. aber nit eifach eini vom kiosk. dr ganz verlag chaufi. aber ich sägs niemerem. hihi.
alle psssst!

usik laut!

16.2: statisch

alle wieder in kreislauf. ca 20sek

usik leiser!

16.3: 4 eggli

philipp und ich wird e huusbsetzer und kämpf für freirüüm!
antonino und ich wird polizist und die lingge zäcke mien gar nit meine!
valentin und ich bi ne jungpolitiker, wo will vermittele.
jennifer und ich bi us em baselland und find eh alles scheisse, was basel macht.

usik aus!

16.4:

salomé und denn explodiert d roche, widr emol. und dr ganz rhy färbt sich rot und übers land zieht e giftgaswolke. e paar chöme drvo, e paar wärde no richer und e paar tätschts.

17: 1, 2, 3

alle 1, 2 oder 3. 1, 2 oder 3 - letzte chance... vorbei! ob ihr wirklich richtig steht, seht ihr, wenn das licht angeht.

18: mittellicht

wer am falschen ort steht, stirbt.

philipp so, und noch m 'störfall' si sich alli einig: me mues öpis mache, dass so öpis nie meh passiert. aber die wo öpis chönnte mache, mache denn doch nüt.

musik an: zirkus2!

19: eggli statisch

> kreislauf.

19.1: lauflicht, mitte

usik leise!

larissa und ich wird umwältingenieurin und forsch für erneuerbari energie!
xenia und ich wird lobbyist und atomchraft isch immerno die energie mit de wenigste klimaschädliche emisione!
larissa aber nur, wenn me johrtausigi vo johr lang strahlig nit als emisione bezeichnet!
xenia kärnchraft isch sicher und suber!
larissa isch si nit!
xenia isch si doch!
larissa isch si nit!
xenia isch si doch!
larissa isch si nit!
xenia und klimaerwärmig giz au nit! das isch nur d sunne, wo... schint.
antonino und ich wird hochbauzeichner und zeichne d plän für s atomändlager in... im usland!
philipp und ich wird baumeister und bau oich das alles ane. egal öb jetz e staudamm oder e atomkraftwärk, hauptsach vil beton! haha!

19.2: 4statisch

usik: laut!

alle wieder zurück > kreislauf.

19.3: lauflicht, mitte

usik: leiser!

antonino ich wird huusmaa. elei erziehende huusmaa! uf das stöhn d chicks voll!
 jennifer voll nit. ich gang zerst go reise. e wältreis mit em vw bus.
 milena ich gang uf venedig. und... china (dazu geste)!
 valentin ich in d usa (dazu geste)
 jennifer und ich uf belgie (dazu geste, aber man weiss keine für belgien)

19.4:

usik: aus!

philipp und denn giz chrieg, widr emol. e paar chöme drvo, e paar wärde no richer und e paar tätschts.

20: 1, 2, 3

alle 1, 2 oder 3. 1, 2 oder 3 - letzte chance... vorbei! ob ihr wirklich richtig steht, seht ihr, wenn das licht angeht.

21:

wer am falschen ort steht, stirbt.

22: krieg

salomé so, und noch m chrieg si sich alli einig: me mues öpis mache, dass so öpis nie meh passiert. aber die wo öpis chönnte mache, mache denn doch nüt.

23: 4statisch

musik an: zirkus2!

> kreislauf.

23.1: laufflicht, mitte

usik: leiser!

valentin ich wird perfekte familievater. schöni frau (salomé), 2 chinder: e meitli (larissa), ei bueb (philipp). ei hund (talía). und e guete job.
 salomé ich gang fremd.
 larissa ich will mer e gschlächtsumwandlig lo mache.
 philipp ich bi drogesüchtig. und schwul. und aids!
 talía wuff.
 hund stirbt.
 antonino si sind entloh!

usik: aus!

24: fade zu choreolicht

alle gehen hin und her ausser valentin
 valentin mist. hesch mer e stutz? hesch du mir e stutz?

musik: immer schön im rhythmus bleiben.

choreo: pong: antonino HR, salome VL, talía VR, philipp HL, jenny HR, xenia VL > milena

7. genug vom leben

25: spiellicht

milena ich mög nümm. wie lang mues me no trainiere, bis es los goht?
 larissa muesch luege, ich stirb grad nach dr geburt und ha all das zügs für nüt glehrt.
 philipp und ich ha päch und chumm als wurm widr zugg. denn bruchi das au nit.
 salomé ich ha ghört, me vergisst eh alles widr. gsehsch das? (zeigt auf philtrum) ich ha ghört, das isch dr fingerabdruck vomene ängel. wenn me noni gebore worde isch, denn kennt me s gheimnis vo dr schöpfig. bevor me aber uf d wält chunnt, macht e ängel 'psst' zu uns. und mir vergässe alles. und dä druckt so fest zue, dass si fingerabdruck für immer blibt.

mehrere aua!
 xenia was sell s gheimnis vo dr schöpfig si? ich weiss vo nüt.
 jennifer denn macht jo das alles eh kei sinn.
 philipp velicht mien mir uns do jetz bewähre zum denn ins paradies uf ärde z cho.
 antonino also wie es paradies gshet s dört nit grad us.
 valentin do au nit.
 talia und das, wo mir glernt hän, dütet au nit grad in die richtig.
 valentin velicht läbe mir jetze scho und wenn mir stärke chömme mir uf d ärde.
 philipp jo ich bi denn sicher scho widr bi sonere minderheit, wo niemer will. sicher scho
 widr s chind vonere arme, alte, schwarze, behinderte, jüdisch-lesbische, elei
 erziehende nazi-zigeunerin. und ich: e verkrüppelte, verstrahlte, siamesische
 albino-zwilling-zwärg-zwitter. und mi mueter will mi uf em schwarzmarkt vo ho-chi-
 minh-city als potänz-zauberpulver verchaufe.
 alle ho ho ho chi minh! ho ho ho chi minh!
 valentin du, was isch eigentlich s ziele vo däm läbe? mues me irgendöpis erreiche, zum
 gwünne?
 antonino was? me cha öpis gwünne? isch das e wettrenne?
 larissa giz note?
 salomé gwünnt me nit eifach, wenn me stirbt?
 jennifer nei, denn het me dank verlore.
 milena gwünnt me, wenn me ganz lang läbt? oder schnäll? oder weni schloft?
 valentin mues me nit eifach so vill chinder mache wie möglich?
 philipp aso wenn si vo dir sin, hän mir verlore.
 larissa cha me gwünne, wenn me böse isch? oder verliert me, wenn me z lieb isch?
 xenia ich glaub, wär am meiste schoggimakkrönli isst, het gwünne.
 philipp wenn me zfride isch, het me gwünne.
 milena wenn me ganz villi erfahrig gsamlet het.
 xenia wettsch mol e finger verliere oder gfolteret wärde? das si au erfahrig.
 milena wenn me ganz vill *schöni* erfahrig gmacht het?
 xenia und was heisst '*schön*' genau?
 milena eifach schön halt... wenn me am schluss lacht statt hüült.
 jennifer aso ich wett, dass me sich an mi erinneret. denn läb ich wenigstens so lang me
 sich an mich erinneret.
 xenia mir mensche si doch eh nur e komplizierteri elektro-chemische maschine us fleisch,
 chnoche und bluet. meh nit. alles wo mir danke und fühle isch nit meh als e
 chemische reaktion oder e elektrische impuls.
 philipp aber isch nit grad das so faszinierend, dass mir nur e maschine si aber doch
 settigi gefühl chönne erläbe und bi andere uslöse? dass mir schönheit erkenne, au
 wenn si nit bi jedem gliich usgshet? dass mir zämme lache chönne und es uns
 denn besser got. isch das nit scho e wunder?
 salomé wenn me dr mensch würd in sini chemische element ufspalte, würd si materialwert
 nur öpe 2 franken choste. aber us däm zugs denn e funktionierende mensch z
 bastle, das isch s wärtvolle dra.
 antonino nei, e mensch isch so vil wärt, wie er in sim läbe no schaffe cha.
 larissa heisst das e arbeitslose mensch isch nüt wärt?
 antonino denn isch e mensch so vil wärt wie er choschtet?
 salomé me döf nit böse si zum gwünne. aso niemerem schade.
 jennifer und wie erkennt me das? chame mi wie es ei gege s liecht hebe, und wenns
 befruchtet isch, denn chunnts wäg?
 larissa ich bi sicher nit befruchtet!

8. sinnkrise:

jennifer also ich bi mol buddhist gsi. das isch zwar nit grad das, woni mir vorgstellt ha, aber passt scho. i mues eh nüm lang reinkarniert wärde, bald chummi is paradies.

xenia was? paradies? chömme buddhiste nit is nirwana?

jennifer jo. dr name isch doch egal.

antonino und jetz? fühlsch di as öpis bessers?

jennifer jo... klar. ich bis jo au.

antonino aso i bi christ gsi und bi au do.

valentin na und, ich bi islamist gsi ha mi in d luft gschprängt und dir sellet jez mini 72 jungfraue si?

salomé immerhin 8.

xenia hee! ich ha schomol... egal.

antonino mit so vil fraue wüsstisch jo gar nüt azfange!

larissa nach ere halbe mögsch eh nüm.

salomé es hän sich dank scho so vil in d luft gjagt, dass nur no dr rästmüll do isch. hehe.

valentin jo dir sit sicher au nit grad nur bravi ängeli gsi!

xenia hee! als ahänger vom jediismus, bi ni e bravs ängeli!

talia i ghör eh nit do ane, scho gar nit mit däm gläubige pack!

streit eskaliert

jennifer es längt. meinet dir öppe, eso chömme mer witer?

alle sind beschämt. jo nei, sorry. has jo nit so gmeint...

milena as atheischt setts mi eh nüm gäh. oder noni. oder nie?

jennifer as agnostiker mues i jetz mol glaub an minere theorie schaffe.

xenia nei, als agnostiker isch s dr scheiss egal, wie s isch. es isch e frog, wo me als mensch nit beantworte cha, wäg däm isch s de agnostiker scheiss egal, wie s isch.

larissa denn bini jez au agnostokoker

xenia agnostiker!

larissa joOo, agnostoker. ha gmeint s isch egal wie s heisst.

anto/valen ich bi jetz au agnostiker.

philipp händ dr s jez ändlich? ich bi satanist gsi und so wie s usgseht spilt religion do eh kei rolle. odr glaubet dir ächt, dass - falls es öpis göttlichs git - es meh als eis git? wo mehreri nirvanas, paradies... paradieser - gopf! was isch d mehrzahl vo paradies?! - egal: wo mehreri nirvanas, pariser und walhallas erschafft? he?! und was isch wenni mi eigeni religion entdeckt hät? miesst mi gott denn no e paradies meh mache? oder e eigene himmel für d meersäuli, rösser und esel? und wo ane got denn s muultier? es git gott, jä, aber nur in de chöpf vo dene, wo dra glaube. die religöse liide doch alli an wahnvorstellige! behandle sett me die!

dreht durch. sie müssen ihn beruhigen.

milena ok. ok. isch jo guet. chill de läbe! oder de läbe tschillt di!

jennifer ich glaub, me gwünnt, wenn me niemerem schadet... aber do ghört me sälber jo au drzue. irgend öperem schadet me doch immer. und wenns d kueh isch, woni iss, odr e salat. das würd no läbe, wenns mi nit gäb.

talia oder d chue hätt n gässe.

jennifer jo und ich d chue, wo dr salat gässe het. chunnt ufs gliche use!

milena läbe isch egoistisch: nur dass ich cha läbe, mien anderi sache stärke.

philipp me chas au anderst usdrucke: si stirbt jo nit würllich. du nimmsch e teil vo de bestandteil vo däm tier oder dere pflanze in di uf und es läbt in und mit dir witer.

valentin wird ich denn zur chue, wenni nur chue iss? oder salat?

antonino nei lueg mol d moslems a: frässe kei schwein und sin doch die grösste soi.

salomé jo und d christe meine e biber sig e fisch, will er im wasser läbt.

xenia dr justin biber isch e fisch? und d christe wän en ässe?
 philipp jo die ässe jo sogar ihre eigene christus. 'der leib christi...'
 erhalten eine hostie
 talia denn willi aber nit wüsse, was du gässe hesch, zum di wärde.
 larissa das heisst, wenn ich tot bi, denn bini gar nit tot? sondern läb eifach in de würmer
 und mit ihne witer?
 philipp öppe eso.

9. Ende. wo hör ich uf?

talia nur will mir alli je e eigenigs hirn hän - also die meiste (schaut zu philipp) - heisst
 das no lang nit, dass mir nit zämme ghöre. s co2 wo ich usschnuf, brucht e pflanze
 widr zum läbe. es isch ei grosse kreislauf.
 larissa nimmt arm einer nahen person und illustriert seinen text damit:
 larissa ab wenn ghört e wurscht, woni iss, zu mir? wenn i se in dr hand ha? wenn ich se
 ins muul nimm und abbiss? wenn ich se im mage ha? oder wenn ich d
 wurstmolekül in mi körper ibaut ha? oder isch die wurst scho e teil vo mir gsi wo si
 no e chue gsi isch? oder isch si scho e teil vo mir gsi, wo si no gras gsi isch? und
 was isch mit em räschte? isch dr wurstgaggi gar nie e teil vo mim körper gsi? oder
 isch er s au no, wenn er scho lang in dr kläralag isch?
 milena und ohni sunne gäbs do gar kei läbe. denn si mir au e teil vo dr sunne oder isch d
 sunne e teil vo uns?
 talia velicht ghört jo eh alles das zämme
 jennifer wo fang ich a, und wo hör ich uf? uf e erst blick bi dr huut, wenn me aber ganz
 nöch ane got, denn isch die hutt au durchlässig. oder wenni mi schnid und bluet
 tropft uf e bode, ab wenn ghört dä bluetropfe nümm zu mir? ab wenn?
 antonino ich glaub eher mir ghöre alli zu eim riisige organismus. irgendwie ghört au d sunne
 drzue, sogar die ganzi galaxie. irgendwie hangt doch das alles zämme. einzelni
 läbewäse wie z b dinosaurier oder mensche wärde vo zit zu zit ersetzt, aber dr
 grossi organismus got immer witer und witer.
 valentin mängmol chunnt s mer vor, als ob mir nur e art filter si. s läbe strömt wie ne fluss
 dur uns dure und e chline teil drvo blibt in uns hange. us dene räste, wo in unsere
 siib hange blibt, forme mir denn uns. eigentlich si mer nur d räste vom läbe. nit s
 läbe an sich.
 grübelt sich dabei den dreck unter den fingernägeln (oder nase oder sonst wo) hervor als
 sinnbild seiner these
 salomé jojo. s läbe isch e mac-friteuse und mir si s fettsieb.
 philipp da formte gott, der herr, den menschen aus dem rest des mac-fettsiebes und blies
 in seine nase den lebensatem...

26: rücklicht

) ton: durchsage:

geschätzte fahrgäste wir nähern uns nun dem geburtskanal. wir bitten sie auf ihre plätze
 zurückzukehren, das rauchen einzustellen, die tische hochzuklappen und in die
 embrionalhaltung zu gehen. wir landen in wenigen minuten. bitte bleiben sie so lange sitzen, bis
 wir vollständig angehalten haben. danke.

27: abschlusslicht

alle gehen auf ihre plätze.
 alle ja, es got los! (oder:) uh nei, ich ha angst. (jeder nach der stimmung seiner figur.)

jennifer hoffentlich gsehn mer uns wider, wenn mir dört unde si.
philipp wie selle mer uns erkenne, mir chöne uns jo nüm an jetz erinnere. me vergisst doch alles.
talía mir mien irgend e gheims zeiche ha, so d händ abklatsche oder so.
macht high5
salomé so öpis doofs macht doch niemer. usserdäm: das vergässe mer doch widr!
antonino velicht e narbe oder e muetermol?
larissa mir wärde s scho merke, süscht isch s jo au glich. ohni erinnereg, kei vermisse!

! ton: es rumpelt und lärmt.

salomé ich ha angst.
lärm bumm.
licht: alle schreien dann plötzlich: choreo marteria.

?8: licht

! ton: song: marteria

?9: nebelmaschine nicht vergessen

BLACK ENDE FERTIG: SCHLUSSAPPLAUS